

**BN Kelantan Janji Perubahan Besar Untuk Anak Muda
Bernama
11 April, 2013**

KOTA BAHARU, 11 April (Bernama) -- Barisan Nasional (BN) Kelantan berikrar membawa satu perubahan yang lebih besar untuk anak-anak muda dengan pembaharuan, tekad dan cita-cita bagi memastikan masa depan mereka mendapat pembelaan selepas 23 tahun diabaikan kerajaan negeri pimpinan PAS.

Perkara itu dinyatakan dalam Manifesto atau Aku janji BN Kelantan yang bertemakan 'Rakyat Dihati Janji Ditepati' yang dilancarkan Pengerusi BN Kelantan Datuk Seri Mustapa Mohamed di Bangunan Umno di sini, Khamis, yang turut berjanji menyediakan 30,000 peluang pekerjaan dalam tempoh lima tahun.

Manifesto tambahan pilihan raya BN itu dirangka khas untuk Kelantan pada pilihan raya umum ke-13 ini.

Selain mewujudkan imam muda dan ulama muda ke arah melahirkan generasi bertakwa dan beramal soleh, Akademi Belia Kelantan akan melahirkan pemimpin muda yang berkaliber, program dana mesra belia dengan menyediakan dana khas dalam bentuk geran dan pinjaman untuk kemudahan golongan itu memulakan perniagaan.

Selain memperkasakan pertubuhan belia, usaha juga akan dibuat bagi mewujudkan pusat-pusat kegiatan sukan lasak, menubuhkan pusat inkubator bagi memasarkan produk-produk yang dihasilkan golongan belia, dan menyediakan litar motosikal.

Manifesto tersebut juga menyebut janji BN untuk menjadikan Kelantan pusat kecemerlangan ilmu iaitu membela kebajikan guru sekolah agama negeri dan sekolah agama rakyat supaya setaraf dengan guru Kementerian Pelajaran.

Selain menubuhkan pusat kecemerlangan pelajar di setiap jajahan, menerusi aku janji itu juga usaha akan dibuat bagi memperkasa sekolah agama rakyat dan sekolah agama negeri, memantapkan sekolah pondok dengan mewujudkan tenaga pengajar dan prasarana yang lebih baik.

Aku janji BN Kelantan itu juga menyebut di bawah kemudahan Asas, BN berjanji melengkapkan kemudahan dan peralatan terkini di setiap hospital daerah, meningkatkan kemudahan prasarana pelabuhan Tok Bali, hab pemprosesan hasil laut dan pusat membina dan membaiki kapal.

Manifesto itu juga menyenaraikan usaha menaiktaraf jalan-jalan dalam semua bandar utama, menyediakan perumahan kos rendah secara tersusun, menaiktaraf bandar-bandar utama termasuk mewujudkan bandar satelit Kota Bharu di Kok Lanas, melaksanakan tebatan banjir Sungai Kelantan dan Sungai Golok, menjadikan Lapangan Terbang Sultan Ismail Petra bertaraf antarabangsa dan hab penerbangan pintu masuk ke wilayah serantau.

Dalam bidang ekonomi pula, BN berjanji untuk meningkatkan dan menambah pelaburan supaya setanding dengan negeri lain, menyediakan lebih banyak peluang perniagaan dan peluang pekerjaan, membina bazar utama di Kota Bharu, mewujudkan pusat pertumbuhan ekonomi yang baru, melipat gandakan usaha mencari gali sumber asli dan hasil bumi negeri Kelantan, dan mengadakan kawasan perniagaan uptown Kota Bharu.

Manifesto tersebut juga menyebut BN berjanji memastikan tanah dapat dimiliki oleh rakyat Kelantan, mempertahankan tanah rizab Melayu daripada terus tergadai, menyelesaikan isu tanah Orang Asli, menyediakan peluang pemilikan tanah untuk masyarakat bukan Melayu, dan menyusun semula ladang rakyat bagi menjamin hak rakyat terpelihara.

Dalam usaha membela rakyat yang terpinggir, manifesto itu menyebut BN Kelantan berjanji menambah peruntukan membaiki dan membina rumah rakyat miskin, bantuan bulanan pesakit kronik dan terlantar, bantuan perkahwinan kali pertama bagi golongan kurang berkemampuan, bantuan golongan balu dan duda miskin, bantuan khas anak yatim miskin, bantuan khas ibu tunggal miskin dan bantuan khas golongan orang kelainan upaya (OKU).

Bagi masyarakat bukan Melayu, manifesto itu menyatakan BN menjanjikan geran tahunan kepada sekolah rendah jenis kebangsaan Cina dan Tamil serta sekolah menengah jenis kebangsaan Cina dan sekolah menengah persendirian, mewujudkan tabung kebajikan untuk masyarakat bukan Islam, menyediakan tapak perkuburan Cina, India, Sikh, Kristian, Siam dan Orang Asli.

Ia juga termasuk penyelenggaraan rumah ibadat, pusat pembakaran mayat dan tanah kubur, dan menjamin semua hak-hak kaum minoriti terbela seperti termaktub dalam perlembagaan.

BN Kelantan juga berjanji untuk menggalakkan sektor pelancongan berteraskan sumber alam semula jadi, tradisi dan warisan, selain mewujudkan perkampungan budaya sebagai pusat pengembangan dan kegemilangan warisan tamadun silam, membaik pulih dan menambah pusat baru pelancongan dan memperkasakan seni warisan budaya tempatan.

Aku janji BN Kelantan untuk wanita pula ialah menyediakan kemudahan asuhan kanak-kanak dalam komuniti dan tempat kerja, melindungi hak dan kebajikan wanita ditinggalkan suami tanpa nafkah, merancang program pembangunan wanita dalam perniagaan dan keusahawanan, dan menyediakan skim pinjaman khas wanita dalam perniagaan.

Bagi sektor alam sekitar pula, manifesto itu menyebut BN berjanji untuk usaha pemuliharaan sungai dan pantai, penanaman dan pengurusan hutan yang lestari, mewujudkan sistem pelupusan sisa pepejal dan pengurusan sampah yang bersistematik dan berkesan, dan menggalakkan teknologi hijau.

Bagi sektor pertanian, perikanan dan ternakan, BN menjanjikan usaha menjadikan Kelantan sebagai pusat pengeluaran makanan negara, membuka kawasan pertanian baru, menaiktaraf sistem pengairan dan saliran di kawasan pertanian, menubuhkan pusat penternakan ruminan, menubuhkan pusat ternakan akuakultur, mewujudkan industri pemprosesan dan hiliran serta pemasaran ke luar negeri.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=941173>